



# ترانيم

ماجد ساوي

## ماجد ساوي

ياغبية ما عرفتيني ابد  
السما مرفوعة بليا عمد  
مارفع ابليس خشم ولا سجد  
طير قلبي كل يوم ببلد  
كل غالي لو هقيته بيتعد  
بمداري كل كوكب للسهد  
العبي بالناس قدام وجدد  
طز فيك وفي الهوى ولو هو شهد

لا تذاكين وتظنيني غبي  
ان طلعتي او نزلتي تهبي  
ما غواني لو هو بحضنك ربي  
ماني لاسراب ابراجك صبي  
ابعدہ انا ولا اسمع وش تبي ؟  
والسهر لا جا يجي كنه نبي  
لكن انا اياك يمي تقربي  
ياغبية الذكي فينا غبي

## ماجد ساوي

ترانيم الطفولة مع شعاع الصبح  
إذا صبت لك الفنجان كله ملح  
شفاهٍ لا نطقت إسمك يحل الذبح  
تحبّ ان حبّبت وتكره معاها الجرح  
يحاول بك هدوءك يقنعك بالصلح  
زهر عمان فتّح وش يفيد الشرح

معاها الشعر والله حدره سيله  
تخيل ملحها سكر وإدّيله  
"بعد عمري" يقول العمر ياويله  
يجر الليل لا طلّت مواويله  
يقول أبلّيس هذا مابه الحيلة  
عجزت وطاح شاعر آه عزّي له

## ماجد ساوي

أنا الحالم ولكني بدون أحلام  
 أنا النايم معاكم معشر النيام  
 أنا حاولت أفهمني مع الايام  
 أنا كلي ترى ألغامٍ بألغام  
 وأنتي هايمٍ بك هايمٍ إهيام  
 أحبك تختصرني يا هبوب الشام  
 تغنين وتصلي بفمك الانغام؟  
 جمعيني ونثريني على الاوهام  
 وصبتيني وفتحت الشعر للإلهام  
 تركتيني لحالي كني الاسلام

إذا للواقعية بيت أنا بابه  
 وأنا الصاحي لعدوانه وأصحابه  
 فهمت أن الطفل لعبة لألعابه  
 أنا المحبوب اللي فجّر أحبابه  
 هيام يرمي البحار بالغابة  
 أحبك ما اظن تكفيني كتابة  
 اذا حتى الجريدة منك جذابة  
 وصدقتك يا أم عيون كذابة  
 صوييك شاعرٍ لقلوب منصابة  
 غريبٍ في زمن يا كثر أغرابه

## ماجد ساوي

أتخالف هالضلوع وضمة الدنيا تزيد  
قال صقر ياصقر يشونك وفوق الجليد  
وشوكة من مبغض جتني ثقل وخزة حديد  
ليت للبركان فم وليت للزلزال أيد  
الحزن دمي ملا العروق شريان ووريد  
ونجمة الصبح بشليلي تصب دموع وصديد  
قلبي احسه طفل عيّد بلا ثوب جديد

بين ضمات العتب وبين ضمات الغضب  
مرمي جفني على غربان بالظهر تحطب  
بشرتني عيني بحبة رمل جت من محب  
ارضي من الوقت حبلتي وقتاد هالعشب  
شارب همومّ محد قبلي ولا بعدي شرب  
الشقى يخيط عين الشمس مع كل مغرب  
قلبي من العشق جاني شايل غبار الكتب

## ماجد ساوي

مصدّق أن الشجر هذا أخضر  
 بالله فكّر أو أنا عنك أفكّر  
 ياهاالغبي أصحى تكفيك عرعر  
 قهوتك بلياً قهوة مي وسكّر  
 تتساقط نجوم السما وانت تسهر  
 يا طفل مليونٍ وجع بكره تكبر  
 هالأكسجين اللي تنفست مو غاز؟  
 هالليل لو ركزت مو وجه معتاز؟  
 أيّة وطن إيقال وأيّ إنجاز  
 وغيرك ملا مسبحه لفته شيفاز  
 وينبت عمى بيدين وبعيون عكّاز  
 بكره ترقى من فوازير لألغاز

## ماجد ساوي

ما ودي تفهمني ولا ودي أفهمك  
تعال نجمع من فمي بس ومن فمك  
أنا أحبك بس وشلون أعلمك  
أنت الممات إن عشت وشلون أبعدمك  
خذني عذر خذني أسف وأنا لملك  
أرجوك لا تفهم خطأ يوم أكلمك

تعال نفهم مع بعض منهو حنّا  
أسراب نطلقهن هناك ويجنّا  
حنّا دفنّا الحب وفيه اندفنّا  
ولا لانت الايام وليه لنّا؟  
شوقٍ واطشك عشقٍ هناك عنّا  
ولا بيك تفهم صح منهو حنّا

ماجد ساوي

لا لبست الشمس  
 قام الصبح يجمع فريقه !!  
 المباني تنهدم وسطي  
 والبشر ..  
 /احجار شطرنج  
 والظهر يزفلت بروحي .. طريقه  
 : .....وش فيك؟؟  
 : .....أبد مافيه شي  
 أبد .. شوي ضيقة

1-

! .....  
 !! .....  
 !!! .....

2-

الفراغ .. اللي يغطونه  
 يطلع من يدين الخبز تنور  
 حساس أنا؟  
 بس ما اظن إحساسي ... يحسونه؟  
 احساس مثل "المحيط الميت"  
 أو "البحر الهادي"  
 من جاب سيرة الهدوء  
 ماني هادي  
 قبر فتح جثة وقال  
 ياموت عادي  
 القبر فاتح!!  
 القبر جامح  
 وش تغطي حتى تغطي؟؟  
 ماني مسوي لك دليل  
 حتى تفهمني



مهما سبحت بداخلي  
 ترجع لشطي  
 مهما تغوص تغوص  
 تظل تحت السطح  
 اه ياو غطي

3-

تبي تفهمني  
 وانت قصدك تفهمني  
 يعني فاهمني وانت مو فاهم  
 قبل لا افهمك كنت فاهم  
 اني اغلا من عيونك  
 اني بقلبك وحيد  
 وان جروحي انا  
 تعتبرها جروحك !!  
 وش تبي ...  
 كنت فاهم ببساطة  
 اني اعز عليك... من روحك !!  
 ويومي فهمت  
 اكتشفت اني غبي !!

4-

تعال اوضح لك  
 نقابها بساطة اخت بسطة  
 جربت تبني جبل .. يجون يهدونه !!!  
 جربت تحفر ببير..  
 وتندفن وسطه !!  
 وكل شي ياخذونه!  
 جربت تعطي  
 وتعطي  
 مليون عام .. وحضرتك تعطي  
 واخر شي يقال/  
 /اخر شي يقولونه  
 وليه ما يعطي !!!

5 -

آه يا غرقتي  
فيك يكره القلب نفسه  
فيك يكره الطفل طيشه  
الحزن يتراكم بريشة  
احس الارض .. ناب جني  
والليل لا ليّل  
كنه لحاف شيطان  
مرات اخاف افتح الباب/  
أفتح الباب تطلع لي حريقة  
يامكان ماجد  
يامكاني  
أعترف لك بالحقيقة  
رغم إنها مرة الحقيقة  
أني أكثر شخص!!!  
أكثر شخص ماني إيمكاني!

## ماجد ساوي

غرب والشباك فاتح قام شاعر فك بابيه  
 لقاري يقرأ الظلام لكاذبٍ تافه منافق  
 صحح الأممي بشعر لعالم الذرة كتابه  
 يدعي علمٍ على السذج وهو بالجهل غارق  
 بعيوني فاس وبيديني حطب ياهي كآبه  
 ما تشوف بمهجتي غير الجثث فوق المشانق  
 شي واحد بس والباقي تمرغ في ترابه  
 اني اعشق لا عشقت اعشق كثر مليون عاشق  
 ناظريني ناظريني ما تشوفين السحابه  
 افتحي كفك ابي للرعده من كفك بوارق  
 جيتي وكل من يجي نقول هذا الله جابه  
 وانت الللي جايبك موعد وصادف جو رايق  
 طار قلب وفز طير ومال غصن بثيابه  
 نورت والله كن الاندلس رجعت لطارق  
 القمر ممزوج بالشمس يتمشى وسط غابه  
 كيف من الانس ونورك اكثر من النار حارق  
 من يقول الحزن اصلا له وجود انتي غيابه  
 تضحكين وكل اسود ياخذ ابيض ويصادق  
 ضحكة تشبه ابد ما تشبه شلون تشابه  
 صوت يسمعه البشر وانا اشربه لو كنت شارق  
 لا تدللتني ذنوب الحب توخذ من حسابه  
 لا تدلعتني يطيب الوقت ويزين المعانق  
 معك كن الارض حفنة اغنية تبغى ربابه  
 معك كن الكون طفلٍ توه من النوم فايق  
 ان طلبتني الليل لونه شاب وهو باول شبابه  
 وان سالتني فراق ما نعطي رغم انا نفارق

# ديوان - ماجد ساوي

• فَنِّ سَابِغِ  
• مَخْلُوقِ  
• تَرَانِمِ  
• عَلَيْنَهَا السَّلَامُ  
• أَطْلَانِ سَلَمِي

<http://alzaweyah.atwebpages.com>

لمخاطبة الشاعر بالامكان المراسلة على عنوان الشاعر

ماجد ساوي - الزاوية المملكة العربية السعودية 9238- ابو فراس الحمداني الصالحية - عرعر 4183-73241

او عبر البريد الالكتروني

alzaweyah@gmail.com  
majed-sawi@hotmail.com

معلومات اخرى

---

البريد الالكتروني

[majed-sawi@hotmail.com](mailto:majed-sawi@hotmail.com)

الفيس بوك

<https://www.facebook.com/majed.sawi.home>

التويتر

<https://twitter.com/MajedSawi>

الانستقرام

<https://www.instagram.com/majedsawi/>

السناب شات

majedsawi2017